

開放文學 – 歷代筆記 – 夷堅甲志 卷第十七

土偶胎 仙井監超覺寺·九子母堂·在山顛·一行者姓黃·主給香火·顧土偶中乳婢·乳垂於外·悅之·每至必摩拊咨惜·一旦·偶人目動·遂起行·攜手入屏後狎昵·自是日以為常·累月矣·積以臥病·猶自力登山不已·主僧陰伺之·至半山·即有婦人迎笑·明日尾其後·婦人復至·以拄杖擊之·鏗然仆地·於碎土中得一兒胎·如數月孕者·令行者取歸·暴為屑·和藥以食·遂愈·

永康倡女

永康軍有倡女·謁靈顯王廟·見門外馬卒·頽然而長·容狀偉碩·兩股文繡飛動·諦觀慕之·眷戀不能去·至暮·家人強挽以歸·如有所失·意忽忽不樂·過一夕·有客至求宿·其儀觀與所慕丈夫等·倡喜不勝情·自以為得客晚·其人遲明即去·黃昏復來·留連數宿·忽泣曰·我實非人·乃廟中卒也·以爾悅我·故犯禁相就·屢不赴夜直·為主者所糾得罪·明日當杖脊流配·至時過爾家門·幸多買紙錢贈我·倡亦泣許之·如期·此卒荷鐵校·血流滿體·刺面曰·配某處·二健卒隨之·過辭倡家·倡設奠焚錢·哭而送之·他日詣廟·偶人仆地矣·

人死為牛

永康軍導江縣人王某者·以刻核疆鶩處官·紹興五年·為四川都轉運司·幹辦公事·被檄榷鹽於潼川路·躬詣井所·召民強與約·率令倍差認課·當得五千斤者·輒取萬斤·來歲所輸不滿額者·籍其貲·王心知其不能如約·規欲沒入之·使官自監煎·既覆命·計使以鹽額倍增·薦諸宣撫使·得利州路轉運判官·未幾死·眉州彭山人楊師錫·以合州守待次田間·夢王來謁·公服後穿出牛一尾·方驚但·侍婢亦驚寤·言見王運使來·衣後有牛尾·相語未了·外報一犢生·遽取火視之·犢仰首淚下·事既著聞·有資中人馬某者·亦為都漕司乾官·每出郡邑督錢·惟以多為貴·不問額之虛實贏縮·必得為期·且以此自負·蜀人以其虐於刷錢·目曰馬刷·或以王君事警之·馬曰·正使見世生兩尾·亦何必問·已而疽發於背之左·瘡稍愈·復發於右·兩疽相對·宛如杖瘡·其深數寸·隔膜洞見肺腑·臭滿一室·同僚往問病·馬生但云當以某為戒·某悔無及也·死時與王相距才一年·

倪輝方技

成都人倪輝·妙於數術·靖康丁未之春·王室不靖·蜀去朝廷遠·音驛斷絕·識者以為憂·成都倅虞齊年祺寶審度卜同謁·輝詢之曰·國勢如此·先生當知之·輝曰·此正古人所謂三月無君之時·歷家以閏月為天縱·去年置閏在十一月·北方愈盛·火至此衰歇·京城苟不守·必以是月·使日官有先見之明·移閏在五月·以助火德·猶有可扶之理·今無及矣·然吾以數推之·國家曆數·至丙午才餘一算·今年五月一日·算當復生·其數無窮·然去今尚兩月·未知能及此日否·因請虞寶各布課·虞之占得申酉戌·寶之占得戌酉申·卦成·喜曰·無憂矣·二課初傳極艱棘·中傳而定·末傳極佳·宋祚當從是愈永·然課中赦書神動·不出百日·當有大霽·可驗也·二公且喜且懼·既而聞京師果以閏月陷·五月一日·上即位於南京·赦書至成都·與輝筮日相去蓋九十五日·紹興二年冬·虞之子並甫允文過輝·輝曰·與君相見無日矣·明年吾入惡限·名曰父子不相見·欲遣小兒往它郡讓之·顧已無及·吾必死·至立春日果死·

解三娘

興州後軍統領趙豐·紹興二十七年春·以帥檄按兵諸郡·次果州·館於南充驛·命吏置榻中堂·驛人前白曰·是堂有怪·夜必聞哭聲·常時賓客至此·多避不敢就·但舍於廳之西合·豐笑曰·吾豈畏鬼者耶·竟寢堂上·至夜間哭聲從外來·若有物直赴寢所·豐曰·汝豈有冤·欲言者乎·言之·吾為汝直·否則亟去·果去·頃之又來·群從者皆聞履聲趾趾然·明日以語太守王中孚·王以為妄也·是夕赴郡宴夜歸·方酒酣未得寐·倚胡床以憩·一女子散發在前立·曰·妾乃解通判女三娘者也·名蓮奴·本中原人·遭亂入蜀·失身於秦司茶馬季恣戶部·家實居此館·李有女嫁郡守馬大夫之子紹京·以妾為媵·不幸以姿貌見私於馬君·李氏告其父·杖妾至死·氣猶未絕·即命掘大窖·倒下妾屍瘞之·今三十年矣·幸將軍哀我·使得受生·豐曰·汝死許久·士大夫日日過此·何不早日自直·曰·遺骸思葬·未嘗須臾忘·是間有神司守·不許數出·十年前妾夜哭出訴·地神告曰·後有趙將軍來此·是汝冤獲伸之時·日夜望將軍至·故敢以請·豐曰·果如是·吾當念之·女謝去·遣人隨視之·至堂·外牆下·沒不見·明日·召僧為誦佛書作薦事·遂行·晚至潼川之東關縣·止縣驛·女子復在前·已束髮為高髻·豐曰·吾既為汝作佛事·何為相逐·曰·將軍之賜·固已大矣·但白骨尚在堂外牆下·非將軍誰為出之·豐曰·吾為客·又已去彼·豈能為汝出力·胡不訴於郡守王郎中·曰·非不知也·戟門有神明·距容輒入·然妾之冤·非王郎中不能理·非將軍為地·何以達於王郎中乎·妾骨不出·則妾不得生·使妾骨獲出而得生·在將軍一言宛轉間耳·豐又許之·再具其事走介白王守·王乃訪昔時李戶部所使從卒·獨有譚詠一人在·委詠訪其骨·詠率十數兵來牆下發土求之·凡兩日·迷不得所在·詠致一巫母問之·巫自稱聖婆·口作鬼語·呼詠責曰·汝當時手埋我·豈真忘所在耶·今發土處即是·但尚淺耳·當時倒下我·蓋以木床·木今尚在·若得木·骨即隨之·頂骨最在下·千萬為我必取·我不得頂骨·不可生·詠驚怖伏狀·又明日·果得屍·郡為徙葬於高原·時紹京為渠州鄰水尉·未幾·就調普州推官·見解氏來·說當日事·紹京繼踵亦卒·關壽卿者孫初赴教官·適館於此·嘗為作記·虞並甫為渠州守·紹京正作尉雲·

夢藥方

虞並甫·紹興二十八年·自渠州守被召至臨安·憩北郭外接待院·因道中冒暑得疾·泄痢連月·重九日·夢至一處·類神仙居·一人被服如仙官·延之坐·視壁間有韻語藥方一紙·讀之數過·其詞曰·暑毒在脾·濕氣連腳·不泄則痢·不痢則瘧·獨煉雄黃·烝面和藥·甘草作湯·服之安樂·別作治療·醫家大錯·夢回尚能記·即錄之·蓋治暑泄方也·如方服之·遂愈·

孟蜀宮人

陳甲·字元父·仙井仁壽人·為成都守李西美彥館客·舍於治事堂東偏之雙竹齋·紹興二十一年四月·西美浣花回得疾·旬日間甲已寢·聞堂上婦人語笑聲·即起映門窺觀·有女子十餘·皆韶艾好容色·而衣服結束·頗與世俗異·或坐或立·或步庭中·甲猶疑其為帥家人·以主人翁病輒出·但怪其多也·頃之·一人曰·中夜無以為樂·盍賦詩乎·即口占曰·晚雨廉纖梅子黃·晚雲捲雨月侵廊·樹陰把酒不成飲·識著無情更斷腸·一人應聲答之曰·舊時衣服盡雲霞·不到迎仙不是家·今日樓台渾不識·祇因古木記宣華·餘人方綴思·甲味其詩語不類人·方悟為鬼物·忽寂無所見·後以語蜀郡父老·皆雲王氏有國時·嘗造宣華殿於摩訶池上·名見於五代史·孟氏因之·今郡堂乃其故址·賦詩之鬼·蓋宮妾雲·西美病遂不起·舊蜀郡日晡不擊鼓·擊之則聞婦人哭聲數十為群者·相傳孟氏嘗用晡時殺宮人·以鼓聲為節·故鬼聞之輒哭·承宣使孫渥·以鈴轄攝帥事·為文祭之·命擊鼓如儀·哭亦止·後復罷雲·甲以紹興三十年登乙科·

魚腹佛頭

資州人何慈妻范氏·事佛甚謹·家嘗烹魚·已剖腹·見脂裏一物極堅韌·剖之乃二佛頭也·其家斲木為全體以承之·至今供養·慈以宣和甲辰登科·後為開州守·八事皆虞並甫說·范氏其表姊也·

徐國華

建安人徐國華·宣和中入太學·夢登高樓上·樓懸大金鍾·有金甲偉人立鍾旁·視徐擊鍾而言曰·二十七甲·再擊·雲·官不過員外·三擊·雲·徐七科·徐悟而言曰·行必取科甲·官至外郎足矣·因記於牘中·但不能曉七科二十七甲之說·靖康丙午·胡騎攻城·庠序諸生·多病腳氣死·徐亦以是疾終·鄉人董縱矩·欲葬之東城墓園·而垣中列兆·已無餘地·乃與後死者皆瘞於垣

外·董以標揭識其處·正居第二十七行之第七穴·歸唁其父·因出其手書·則夢中神告·無少差者·寧國人□德升說·清輝亭

廣西昭州·最為癘毒之地·而山水頗清婉·郡圃有亭名天繪·建炎中·郡守李丕·以與金國年號同·欲更之·乞名於寓公徐師川·久而未得·有范滋者·為易曰清輝·已揭榜·徐謁李同坐亭上·少焉策杖於四隅·視積壤中有片石·班班如文字然·命取而滌之·乃丘濬所作記·其略云·予擇勝得此亭·名曰天繪·取其景物自然也·後某年月日·當有俗子易名清輝者·可為一笑·考范生初命名之日不少差·

芭蕉精

興化人陳忱·崇寧中·以上書得罪·送德安府學自訟齋·與郡士劉李二生同榻·李在內·陳居中·劉最處外·一夕劉覺·體畔甚熱·見一物·如茜被包裹臥其旁·大懼·明夜先二人未寢·徑趨床內·與李易位·李所睹亦然·皆不敢言·至夜爭據便處·陳曰·豈有所畏邪·我請嘗之·既寢·聞戶外歎息聲·若欲入而不敢者·他夕陳先就枕·劉奏廁方來·不得已復居外·見如前時·始以實告陳·陳奮然以身當之·復聞有聲·即大呼而出·其物踉蹌越窗外·至芭蕉叢而滅·明日盡伐去蕉·又穿地丈餘·無所得·自是怪遂絕·咸疑為芭蕉精雲·黃子亨彥質說·黃德安人也·

姚仲四鬼

姚仲·始為吳玠軍大將·嘗與敵人戰小衄·吳欲誅之·仲曰·以裨將四人引軍先退·故敗·吳召四將斬之而釋仲·後數歲·仲領兵宿山驛·見四無首人·皆長二尺許·揖於庭·曰·我輩敗事當死·然公不言則可全·今皆死·故來索命·仲曰·向者奔北·我自應以軍法行誅·既屈意相貸·而少師見責·我若不自明·則代汝曹死矣·四人曰·當時之退·但擇一人先遁者·足以塞責·何至是·仲無以對·四鬼漸喧勃欲上·忽有白鬚老人出於地·亦長二尺餘·詰之曰·汝等敗軍伏法·乃其分·安得復訴·叱去之·應聲而沒·老人亦不見·人以是知仲之必貴·又十年·以節度使都統興元軍·路彬質夫說·

陳茂林夢

福州長樂士人陳茂林·夢至大殿下·與數十人班謁·笏記雲·官職初臨·朝儀未熟·既寤·謂必登第為龍首·謁至尊也·遂更名夢兆·紹興十七年·為解頭·赴鹿鳴燕·與同薦送者謁大成殿·舊例以年齒最高者為首·陳不可·曰·吾為舉首·應率先多士·眾莫與之爭·既焚香·當再拜禮畢·陳誤下三拜·有聞其夢者·笑曰·此所謂官職初臨朝儀未熟也·陳亦惘然·疑為已應夢果不第·林之奇少穎說·

張德昭

建陽人張德昭·老於進士·以特恩補官·得傷寒疾·為黃衣人持符逮去·至幽府·抗聲廷下曰·追到建州張德昭·王者怒曰·命爾追某州孔昭德·今誤何也·付吏治其罪·命張還·張懇曰·業儒白首矣·僅得一官·今日獲至此·欲一知壽祿幾何·幸哀許之·主者曰·天機理不容泄·壽數難言也·又拜乞官祿所至·則沉思移時·如閱籍者·曰·位至作邑·張遂出·逢一婢於途·問所以來·曰·到此已數日·家中並無恙·乃前行·抵深谷邊·足跌而寤·問其家·始知此婢相繼死·才一日耳·張益愈·訪劉彥衝子翬於崇安山中·以事告·曰·老矣·詎復榮望·今下攝承簿尉·果若所言·得宰一邑·猶須十年間·□自喜也·是歲調補汀之清流尉·至官逾歲·會縣令罷去·暫攝其治·遂亡·距入冥時僅三年·劉口甫說·

峽山鬆